

Vel ut alij, Considera primo cuspidem secundæ domus. Si fuerit signum boni planetæ, uel mali essentialiter. Nam si fuerit essentialiter fortuna, dabit diuitias. Si infortuna, non dabit.

Secundo, uide an aliqua fortuna in secunda fuerit corporaliter bene disposita, uel quæ per medietatem orbis sui cuspidem tangit uel irradiat, maxime si Iupiter fuerit, uel si in cuspidem secundæ domus fuerit stella fixa primæ uel secundæ magnitudinis, de natura simplici Iouis uel Veneris, præcipue de natura Iouis. Quod si sic fuerit, quod illa fortuna fuerit in loco dicto bene disposita, significat diuitias, etiam si Almuten secundæ aliud significaret. Ita si cum dicta dispositione bona, etiam Almuten secundæ fuerit bene dispositus, ac pars fortunæ & Almuten eius fortuna fuerit, & receptus, & multis planetis permixtus, significat nato multas & immensas diuitias, etiam à multis & diuersis partibus, à diuersis locis & modis. Infortuna uero ibi corporaliter, uel per aspectum in medietate sui orbis, stante quacunque dispositione bona Almuten secundæ, nisi pars fortunæ ac eius dominus, hæc prohibuerint per eorum dispositionem bonam, ueruntamen quomocunque se istæ habeant, scias quod dispositione sic stante, natus non poterit habere immensas diuitias.

Tertio, si dominus secundæ domus fuerit fortuna, & fortis in figura, & maxime fortunatus ac receptus, multis planetis beneuole permixtus, & fuerit gradus secundæ domus fortunatus, natus habebit magnas diuitias, multis modis & à multis locis, etiam quacunque dispositione alia stante. Sed si secunda domus & eius dominus fuerint infortunati & male dispositi, non dabunt.

Quarto, considera partem fortunæ, & eius dominum, quæ si fuerit in loco bono, & dominus eius fortis ac fortunatus, tam essentialiter quam accidentaliter, dat diuitias, & bonum esse ipsarum, stante quacunque dispositione à secunda domo sumpta. Si pars fortunæ fuerit fortunata in bono loco cœli, & eius dominus infortunatus, dic nato fortunam & bonum, tamen remisse ratione significati illius signi, in quo est, unde si in quartam domum ceciderit, præcipue in signum terreum, natus habebit aliquo modo bona & fortunam, ratione laboris terræ, uel ædificationis, uel in similibus significationibus quartæ domus, sic etiam de cæteris domibus dices. Si pars fortunæ fuerit infortunata, dic oppositum ratione loci, in quo est, & hoc remisse, si dominus eius fuerit bonus, & bene dispositus, dic bonum in diuitijs ex parte loci & natura domini partis fortunæ fortunatæ, sed remisse. Pars fortunæ in gradu ascendente, significat quod natus habebit multas diuitias ex leui occasione, si id alias non impeditur, uidelicet mala dispositione domini partis fortunæ, quoniam tunc daret remissiores. Notandum autem quod si aliquis significator diuitiarum infortunatus in aliqua domorum ceciderit, significat damnum substantiæ de significato talis domus.

Quinto, uide partem substantiæ & eius dominum, Si fuerint bene dispositi & fortunati, significant diuitias, Si male non dabunt opes.

Sexto, uide Iouem naturalem significatorem substantiæ. Si fortunatus uel fortis fuerit in mundo, uel in figura, præcipue in secunda domo, dat diuitias, & bonum usum earum. Si debilis, neutrum dat.

Septimo, considerabis duos primos dominos triplicitatis domus secundæ. Si primus directus fuerit in aliqua suarum dignitatum principalium, scilicet in domo uel exaltatione sua, firmus in angulo, et in auge ecentrici, uel ad ipsam auge ascendit, auctus numero & lumine, uel fuerit in dignitatibus alterius benigne receptus, applicantibus ei planetis ex permixtione beneuola, significat diuitias, quæ processu temporis augmentabuntur. Si fuerit infortunatus, & cadens à dignitatibus prædictis, significat contrarium. Si secundus dominus triplicitatis fortis, & fortunatus fuerit, sicut dictum est, natus de suis diuitijs expendet in bonum & utilitatem suam, & de